

*The Honorable.*

*(Mrs) Leela Devi*

*DOOKUN-LUCHOOMUN*

*Minister of Education and Human Resources, Tertiary  
Education and Scientific Research*

*13 January 2017*

**Speech/ Sandesh:**

1. **Aaj ke kaaryakram ke mukhya atithi Mauritius ganraajya ke kaaryavaahak raashtrapati, mahaamahim shree Paramasivum Pillay Vyapoory,**
2. **Mantrigan**
3. **Bharatiya uchaayukta Mahaamahim Shri Abhay Thakur ji,**
4. **Vishwa Hindi Sachivaalay ki shaashi parishad ke upasthit sadasya – Dr. Uday Naraayan Gangoo Ji evam Shri Satyadeo Tengur Ji,**
5. **Vishwa Hindi Sachivaalay ke Mahaasachiv Professor Vinod Mishra Ji,**
6. **China se aye hue hamaare vishishtha atithi, Hindi visheshagya Professor Jingkui Jiang,**
7. **desh videsh se padhaare atithi gan, Hindi premiyo aur priy chaatro,**

**all Protocol observed.**

Aap sabhi ko meraa saadar naman. Meri aur se Vishwa Hindi Diwas ki haardik shubh kaamanaayein aur nutan varsh abhinandan.

**Yah atyant harsh kaa vishay hai ki aaj iss aitihaasik sabhaagaar mein hum sabhi Hindi premi vishwa hindi divas ke shubh avsar par ekatrit huwe hain.**

Jaisa ki aap sabhi jaante hain ki Vishwa Hindi rangmanch par Mauritius ka vishesh sthaan hai. Yahan par preprimary se lekar, primary, secondary aur tertiary ki Ph.D level tak Hindi ki vidhivat parhaayi hoti hai.

Hindi mein jitna saahitya chaahe kahaani, chaahe kavita ya upanyaas rachaa gayaa, utnaa kisi anya diaspora desh main nahin huwa hai. Aaj garva ke saath kah sakte hain ki Mauritius, Hindi ke prachaar-prasaar main aham bhumikaa nibhaa raha hai. Kabhi kabhi khud Bhaarat vaasi iss vistrit saahitya ko dekhkar chakit rah jaate hai. Yah chamatkaar Hindi bhaashaa ka hai.

Yaha uchit hai ki aaj Mauritius me Vishwa Hindi Sachivaalay ke bhavan ka nirmaan ho rahaa hai. Iss se na kewal Hindi ki pragati hogi balki Mauritius aur Bharat ka naabhi-naal-sambandh aur bhi rang layega. Maa Bhaarat aur suputra Mauritius donon milkar vishwa ke kone-kone ko Hindimay banaa denge, iss me koyi sandeh nahin hai.

Mauritius me Hindi bhaashaa ke prachaar-prasaar me sarkaari aur gair sarkaari sansthaaon ka prashasniya yogdaan rahaa hai. Unke prati main nat mastak houn. Aap logon kaa saath banaa rahe to asambhav bhi sambhav ho sakta hai.

Mauritius ko Hind Mahaasaagar kaa *star and key* kahaa jaata hai. Mauritius Hindi ko *Francophone* tatha Hindi Bhashi deshon main prasaarit karne ka biraa uthaa rahaa hai, *key role* nibhaa rahaa hai.

Mere mantraalay ne schoolons mein Hindi tatha anya Bharatiya Bhaashaaon ko vishesh sthaan diya hai. Bachchon ke sarvaangin

vikaas yaane ki *holistic development* ko dhyaan me rakhte huwe in bhaashaon ki parhaayi ki vyavasthaa ki gayi hai. Aashaa karti houn ki iss se adhikaadhik bacchon ko Hindi parhne ka sunehra mawka milegaa.

Aajkal ke bacche *digital natives* hain. Hindi ke pathan-paathan me iss dishaa me bahut pragati huwi hai.

Sankore pariyojna, mantraalay dwaaraa chaatron ke liye tablet, pustakon ke saath *e-books* aur *multimedia packages* tathaa ICT se joore anya upkaran uplabdh karaaye jaa rahe hain. Iss prakaar Hindi aaj sirf purvazon ki bhaashaa na rahkar din pratidin aadhunik vikasansheel aur vaishwik banti jaa rahi hai.

**Ab samay aa gayaa hai ki Hindi ko hamaare purvajon kii bhaashaa se aage barhkar udyog aur viavsayé kii bhaashaa banaayaa jae. Pichhle dinon Mauritius Chamber of Commerce and Industry ne Angers vishwa vidyaalay (France) tathaa Mahatmaa Gaandhi Sansthaan ke aapsii sahyog se apne diploma in tourism program mein Hindi bhaashaa ka module sammilit kiyaa hai. Yah desh-videsh mein Hindi ke barhdte daéré aur mahatw poorn bhoomika kaa shubh sanket hai. Vaishwiikaran ke is yug mein Hindi kii barhti lokpriytaa tathaa soochnaa evam sanchaar pradyogiki kii unnat sambhaavnaaon mein Hindi duniyaa kii anya bhaashaon ke saath na kewal kadam se kadam milaa kar chal rahi hai balki tezi se aage bhi barh rahi hai. ikkiiswi sadi Hindi kii sadi hogi, aisa mera vishwaas hai.**

Mauritius me Hindi bhaashaa jan-jan tak *media* ke maadhyam se pahouch rahi hai, jaise FM Radio channels, Tv channels aadi. Iss prakaar ghar bhaithe Hindi aur Ahindi bhaashi (bhale hi *subtitles* dwaaraa) Hindi karékramon ka aanand har samay uthaa sakte hain.

**(Do Hazar Pandrah)** 2015 me, Bhopal me aayojit dasvein vishwa Hindi Sammelan me ek Sashakt Mauritian Delegation ke saath maine bhaag liyaa thaa, jiskaa udghaatan Pradhaan Mantri Shri Narendra Modi ji ne kiya tha. Issi sammelan ke antargat yaha sukhad nirnaay liya gaya ki agla vishwa Hindi Sammelan san 2018 **(atharah)** main Mauritius main aayojit kiya jaayegaa. Iss mahaa yagya me aap sabhi ki aahuti ki apekshaa karti houn.

Hindi premiyo, aaj Hindi ki uplabdhiyon ko manaane ka diwas hai. Jinhonne bhi janani Hindi ki ji-jaan se, tan, man, dhan se, aur nishkaam tathaa samarpit bhaav se sevaa ki hai unko koti koti naman karti houn. Hindi ki mashaal sada prajwalit rahe.

Hindi ka vijaypataakaa, Bhaarat, Mauritius aur Vishwagagan mein nirvighna roop se sadaa lahraata rahe. Aisi hamaari manokaamna hai.

Isi ke saath main apni vaani ko viraam deti hun. Aap sabhi ke dhyaan ke liye dhanyavaad.